

lebrata debetne esse de patrono? Si capellanus principali ecclesiae sit adscriptus, affirmative, prasertim ubi Breviarium dicēsis recitare et missam ei conformem celebrare solet; secus, non. In dubio, quid faciendum sit dicat episcopus.

13º Alia restat difficultas solvenda, an scilicet, in capellis ad regulares non pertinentibus, festum patroni eodem ritu celebrandum sit ac in ecclesia parochiali, et an solemnitas debeat pariter in dominicam occurrentem transferri? Sententia affirmans sola videtur sequenda, nisi aliquod festum gradus saltem aequalis et eidem capella proprium, celebrandum occurreret: nam 1º S. Rit. Cong. respondens, 17 aug. 1709, officium et missam *titularis* ecclesiae parochialis non debere celebrari in capellis, supponit non ita esse de principali *patrono*; 2º festum patroni loci, v. g., provinciae, oppidi vel pagi, ritu solemnii et die dominica, quoad solemnitatem, celebraretur: et, ex more apud nos recepto, patronus ecclesiae parochialis est simul patrouus loci; ergo, etc. Hoc videtur pariter intelligendum de octava, tum in officio recitando aut cantando, tum in missa celebranda.

14º Quae praecedunt ad patronum propriæ dictum restringenda sunt, et non extenduntur ad patronum secundarium: officium patroni secundarii, ritu duplicis majoris in Romano (*Rub. de occurrentia, Gavantus et Merati*, t. 3, p. 97 et 99), ritu solemnis majoris in Cenomanensi, recitari debet ab omnibus et solis clericis ecclesiae servitio vel beneficio adscriptis: ratio est quia patronus secundarius ordinarie non reputatur patronus loci; idcirco a clericis in territorio parochiae degentibus, sed ecclesiæ non adscriptis, officium ejus regulariter non recitat. Consuenda est tamen consuetudo locorum et præsertim voluntas ordinariorum.

CAPUT TERTIUM.

DE JEJUNIO.

Jejunium in sua generali significatione importat abstinentiam a cibo. Quadruplex distinguitur: spirituale, morale, naturale et ecclesiasticum.

Jejunium spirituale est abstinentia a vitiis, juxta Prophetæ verba, Isai. LVIII, 6: *Nonne hoc est magis jejunium quo-l elegi? Dissolve colligationes impietas.* Unde S. Aug. Tract. 17 in Joannis Evang. « Jejunium magnum » et generale est abstinere ab iniquitatibus et illicitis voluptatibus sæculi, quod est perfectum jejuniū. »

Jejunium morale est continentia in cibi potusque sumptione juxta temperantiae regulas; jejunium naturale est abstinentia ab omni prorsus cibo et potu, quale est jejunium ad susceptionem sanctæ Eucharistiae requisitum; et jejunium ecclesiasticum est abstinentia a pluribus refractionibus certoque ciborum genere, juxta Ecclesiæ regulas. De illo solo hic agitur, et dicemus 1º de potestate Ecclesiæ jejunia præcipendi; 2º de jejunis ab Ecclesia præceptis; 3º de conditionibus ad jejunandum requisitis; 4º de causis a jejunio excusantibus, et 5º de iis qui ratione jejunii et abstinentiae peccant.

ARTICULUS PRIMUS.

DE POTESTATE ECCLESIAE JEJUNIA PRÆCIPENDI.

Plures veteres hæretici non solum jejunia non negabant, sed falsis quibusdam momentis innixi, ea ultra modum multiplicabant vel rigidiora faciebant; recentiores vero, ut Lutherani et Calvinistæ fatentes jejunia in veteri Lege fuisse præscripta, negant Ecclesiam habere potestatem obligandi Christianos ad jejunandum: contra quos sit

PROPOSITIO.

Ecclesia habet potestatem obligandi Christianos ad jejunandum.

Probatur Scriptura sacra, praxi Ecclesiæ, testimoniis Patrum, et ratione.

1º *Scriptura sacra.* Multa reperiuntur jejunia in Veteri Testamento a Deo præscripta; sed insuper 1º Synagoga instituit jejunium in memoriam liberationis filiorum Israel a persecutione Aman, Esther, ix, 17; 2º Jonadab, filius Rechab, filiis et nepotibus suis prohibuit usum vini usque in sempiternum, Jerem. xxxv, 18, et Deus eos laudavit eo quod omnia mandata patris sui custodirent; 3º Apostoli, in concilio Jerusalem, omnibus preceperunt ut a suffocato et sanguine abstinerent: porro Ecclesia eamdem saltem habet potestatem quam habuerunt Jonadab et Synagoga, eamdem quam Apostoli exercuerunt ut legislatores: ergo.

2º *Praxi Ecclesiæ.* Ex antiquis canonibus, v. g., 69 corum qui Apostolis tribuantur, 19 concilii Gangrenensis, anno 324 celebrati, aliisque pluribus apud Gratianum, 3º part., dist. 3, relatis, nec non ex toto Historiæ ecclesiasticæ decursu, constat Ecclesiam semper habuisse jejunia, ea commendasse, præcepisse et observari jussisse: Ecclesia autem talen exercere non potuit potestatem si eam a Christo non acceperit: ergo.

3º *Testimonis Patrum.* Quicumque enim opera Patrum legerunt, negare non possunt eos jejunia ecclesiastica agnoscere, observasse et ab omnibus legitime non impeditis observanda docuisse: plures de jejunio expresse scripsierunt, ut Tertullianus, l. de jejunio; vel sermones ad populum habuerunt, ut S. Basilus, S. Augustinus, S. Chrysostomus, etc.: ergo.

4º *Ratione.* Jejunium ab Ecclesia præcipi potest si sit bonum et ad fines bonos dirigi possit: atqui hoc utrumque verum est. 1º Jejunium est bonum in se et laudabile, ut ipse fatetur Calvinus, alioquin Deus illud non præcep-

pisset in Veteri Testamento, Christus illud non commendasset in Novo, tum proprio exemplo, tum dicendo, v. g., Matth. vi, 16: *Cum jejunatis, nolite fieri sicut hypocritæ tristes..... cum autem tu jeunas, unge caput tuum, etc.* 2º Ad fines bonos dirigi potest, nempe ad iram Dei placandam, ut fecerunt Ninivitæ, ut sape exhortantur Prophetæ, ad dæmones expellendos, juxta hæc Christi verba, Matth. xvii, 20: *Hoc autem genus non ejicitur nisi per orationem et jejunium; ad se humiliandum, sicut David poenitens, Ps. xxxiv, 13: Humiliabam in jejunio animam meam; ad concupiscentias refrenandas, carnem affligendo, etc.: ergo.*

Objiciunt Protestantes et hodierni increduli: 1º Deum pluries manifestasse per Prophetas, v. g., per Jeremiam, xiv, 12, dicendo, *Cum jejunaverint, non exaudiam preces eorum, jejunia sibi grata non esse;* 2º verba Christi, Matth. xv, 11, dicentis: *Non quod intrat in os coinquiat hominem, sed quod procedit ex ore, hoc coinquiat hominem;* 3º verba Pauli, 1 Cor. x, 25: *Omne quod in macello venit manducate, nihil interrogantes propter conscientiam,* I Tim iv, 1 et 3: *Spiritus... manifeste dicit quia in novissimis temporibus discedent quidam a fide, attentes spiritibus erroris... prohibentium nubere, abstinere a cibis quos Deus creavit ad percipiendum cum gratiarum actione, etc.*

Respondet autem ad primum, Deum non manifestare jejunia in genere sibi grata non esse, cum contrarium saepe ostenderit, sed jejunia, preces, holocausta peccatorum impenitentium sibi non placere; ad secundum, cibos ex natura sua animam non coinquinare, sed ubi sumuntur contra præceptum, violationem præcepti, coinquinare, ut patet exemplo Adæ et uxoris ejus; ad tertium, beatum Paulum loqui contra illos qui cærimonias Judaicas adhuc observare volebant, et prohibet ne fideles interrogarent an cibi in macello expositi essent lege Mosaica permitti vel idolis oblati, nec ne; ad quartum, Apostolum designare Marcionem, Tatianum aliasque hæreticos qui perpetuum inducere voluerunt abstinentiam, ad contem-

nenda et abominanda Creatoris opera. Quis bona fide hæc attendens non videt quam talia objecta sint absona et a vero sensu aliena?

ARTICULUS SECUNDUS.

DE JEJUNIIS AB ECCLESIA PRÆCEPTIS.

Jejunia ecclesiastica nunc usitata reducuntur ad Quadragesimam, Quatuor Tempora et Vigilias.

1º *Quadragesima*. *Calvinus* eam exhibit, Inst. I. 4, cap. 22, § 20, ut superstitionem observationem; Lutherani et Calvinistæ ei subscriptentes, jejunia sicut cælibatum sustulerunt, quia, ut ait *S. Aug.*, *venter et genitalia sibi vicina sunt*.

Ecclesia autem catholica docet jejunium Quadragesimale ab ipsis Apostolis institutum fuisse; in omnibus enim sæculis videmus illud observatum apud Græcos et apud Latinos: concilium Nicænum, can. 5, statuit ut concilium provinciale habeatur bis in anno, *ante dies Quadragesimæ*, et *circæ tempus autumni*; *Eusebius*, Hist. I. 5, cap. 23, ait ex traditione Apostolorum sancitum esse ut alio quam Resurrectionis die jejunia solvi non liceat; *S. Aug.*, Serm. 209, 5 in Quadragesima, dicit: « Hi sunt quadraginta dies sacratissimi toto orbe terrarum, quos, propinquante Pascha, universus mundus, quem Deus in Christo reconciliat sibi, prædicanda devotione celebrat. » Merito igitur concluditur hanc consuetudinem per quadraginta dies ante Pascha jejunandi, quam universa tenet Ecclesia, que nec conciliis fuit instituta, sed semper retenta est, non nisi auctoritate Apostolica traditam rectissime credi.

Hæc tamen Quadragesima non habenda est ut institutionis divinae, siquidem nulla ejus fit mentio in Evangelii, nec in scriptis Apostolorum, nec ullibi nobis repræsentatur ut de præcepto divino existens: est ergo institutionis Apostolicæ per traditionem ad nos transmissæ.

Duo a Calvinianis objiciuntur testimonia, unum *S. Irenæi* apud *Euseb.*, Hist. I. 5, cap. 24, dicentis: « Quidam

existimant unico die sibi esse jejunandum, alii duobus, alii pluribus; nonnulli etiam quadraginta horis diurnis ac nocturnis computatis diemi suum metiuntur; alterum *Socratis*, narrantis in sua Historia, I. 5, cap. 22, Romanos tres hebdomadas continuas ante Pascha jejunare, exceptis sabbato et dominico die, etc.

Sed 1º *S. Irenæus* de varietate continuandi jejunium tantum loquitur, non vero de varietate dierum jejunii; quidam enim singulis diebus cenabant, quidam biduo vel etiam triduo a quibuslibet cibis abstinebant; alii singulis diebus corpus refici posse arbitrabantur, sed dies suos ex quadraginta horis componebant, etc., ut satis innuunt hæc Irenæi verba, *diem suum metiuntur*. Ergo. 2º *Socrates*, Novatiana et Ariana hæresi infectus, nullam meretur fidem, cum Romanis detrahere volens, *S. August.*, *S. Leoni Magno* aliisque omnibus impudenter contradicat.

2º *Quatuor Tempora*. Contendunt etiam Calvinistæ jejunia Quatuor Temporum longe post Apostolorum ætatem pontificia auctoritate inventa fuisse: communis, e contra, catholicorum sententia est illorum originem ab Apostolis repetendam esse; *S. quippe Leo*, traditionum Apostolicarum accuratus investigator, ait, Sermone 92, de jejunio septimi mensis, id est, mensis septembris, quia annus Romanus a mense martio tunc incipiebat: « Quod enim dudum et traditio decrevit, et consuetudo firma vit, nec eruditio ignorat, nec pietas prætermittit.... ut jejunium quod nobis septimi mensis recursus indicit, fide alacri per castigationem animi et corporis celebramus... Ideo enim ipsa continentia observantia quatuor est assignata temporibus, ut in idipsum totius anni rediunte decursu, cognosceremus nos indesinenter purificationibus indigere, semperque esse nitendum, dum hujus vitæ varietate jactamur, ut peccatum quod fragilitate carnis et cupiditatum pollutione contrahitur, jejunii atque eleemosynis deleatur, »

Hic ergo iterum applicari potest regula a *S. Augustino* tradita et a nobis saepè repetita: *Quod universa tenet Ec-*

clesia, nec concilii fuit institutum, etc. Probabile tamen videtur jejunia Quatuor Temporum in Galliis non fuisse recepta ante octavum sæculum, et præxiū eorum non fuisse ubique uniformem, nisi post Gregorium VII et Urbanum II, ac proinde in undecimo sæculo, ut probat Thomassin, parte 2, cap. 18.

In Veteri Testamento quædam instituta erant jejunia post captivitatem Babylonicam observata, ut patet ex his prophetae Zachariæ verbis, viii, 19 : *Hæc dicit Dominus exercituum : Jejunium quarti, et jejunium quinti, et jejunium septimi, et jejunium decimi erit domui Iuda in gaudium*, etc. Sed non erant jejunia Quatuor Temporum, ut apud nos; bene vero observabantur in memoriam obsessionis urbis sub Nabuchodonosor, eversionis murorum, captionis et mortis Godoliæ, ut videtur in calendario Juðæorum adhuc usitato inter eos.

3º Vigiliæ. Christus quandoque erat pernoctans in oratione Dei, Luc. vi, 12; Media nocte Paulus et Silas orantes laudabant Deum, et autiebant eos qui erant in custodia, Act. xvi, 25. Horum exemplo primi Christiani in pervigilio magnarum solemnitatum solebant ad sepulera martyrum pernoctare, ut constat ex pluribus monumentis, v. g., ab Ammiano Marcellino, Hist. l. 28; a Plinio juniore apud Tertull., Apol. c. 2; a S. Hieronymo vigiliæ et pernoctationes in basilicis martyrum adversus Vigilantium fortiter defendente. Ineunte quarto sæculo, concilium Eliberitanum, can. 25, prohibuit ne « feminæ in » cœmeterio pervigilent, eo quod sæpe sub obtentu orationis scelera latenter committant. » Cum enim cœmeteria essent loca subterranea et obscura, facilis erat turpitudinum perpetratio: sapienter igitur statutum fuit ut feminæ vigiliæ in privatis suis oratoriis haberent.

Hujusmodi vigiliæ erant præparatio ad celebrationem solemnitatis disponens, et jejunium importabant: diu perseveraverunt, et non raro graves genuerunt abusus. Concilium Connacense, anno 1260 celebratum, pernocitationes in ecclesiis et cœmeteriis prohibuit, ob actiones turpes aut violentas, ob saltationes quæ in his locis sacris

sæpe fiebant. Hæc prohibitio renovata fuit a Clemente V, in concilio Viennensi, anno 1311, et a Clemente VIII, in concilio Aquileiensi, anno 1596, ob easdem rationes.

De medio autem sublatis vigiliis, excepta vigilia Nativitatis Domini, remanserunt jejunia in pervigilio quarundam solemnitatum. Vigiliæ sic conservatae cum jejunio sunt vigilia Nativitatis Domini, vigilia Paschæ quæ est ultima dies Quadragesimæ, vigilia SS. Petri et Pauli, quæ in Galliis quoad jejunium tantum transfertur ad sabbatum ante dominicam solemnitatis dictorum SS. Apostolorum, ex decreto card. Caprara diei 21 junii 1804, apud Romsée, t. 5, p. 24 edit. 1838; vigilia Assumptionis et vigilia Omnium Sanctorum. In decreto hic citato reservatur etiam vigilia Pentecostes; sed jejunium hujus vigiliæ suppressum fuerat in provincia Turonensi, per mandatum commune diei 8 maii 1780.

Plurima olim erant alia jejunia, ut in Adventu, in Rationibus, in festo S. Marci, in calendis januarii, in sabato, Romæ, etc.; sed cum ubique obsoleverint, de illis nihil dicemus.

ARTICULUS TERTIUS.

DE MODO JEJUNANDI.

Certum est apud Catholicos jejunia supra recensita et conservata, sub peccato mortali per se obligare. *Ita unanimiter doctores*; et Alexander VII sequentem damnavit propositionem, anno 1666 : « Frangens jejunium Ecclesiæ, ad quod tenetur, noui peccat mortaliter, nisi ex contemptu vel inobedientia hoc faciat, puta, quia non vult se subjicere præcepto. »

Examinandum est igitur quid necessarium sit ut præceptum jejunii debite impleatur. Conditiones requisitæ ad quatuor reduci possunt, scilicet 1º ad abstinentiam a carnis, 2º ad abstinentiam ab ovis et lacticiniis, 3º ad unicam refractionem, et 4º ad cœnulam ex indulgentia permisam.

1º *De abstinentia a carnibus.*

1º Seclusa controversia olim agitata, an scilicet abstinentia a carnibus sit pars jejunii principalior aut minus principalis, certum est apud omnes catholicos illam esse de præcepto et ad essentiam jejunii ecclesiastici pertinere; nunquam enim Ecclesia præcipit jejenum simpliciter, quin simul abstinentia a carnibus præcipiat, quamvis ab illa dispensare possit, ut infra dicemus.

Dicimus ad *essentiam jejunii ecclesiastici*, quia jejunium in unica refectione sistens, absque delectione ciborum concepi potest, et probabile est Judæos sic olim jejunasse. Minime vero inde concludi potest, ut volunt Protestantes, nullum ciborum delectum in jejunio admittendum esse; quia Ecclesia tam habet potestatem esum carnium prohibendi, quam unicam refectionem præcipiendi.

2º Nomine carnium die jejunii prohibitarum intelligentæ sunt, juxta S. Th. 2 2, q. 147, art. 8, et omnes doctores, *carnes animalium in terra nascentium et respirantium*, per oppositionem ad animalia in aquis nascentia et respirantia. Unde 1º omnia quadrupedia et bipedia, in terra viventia, aves per aerem volentes, et generatim ea animalia quæ in aquis respirare nequeunt prohibentur; 2º pisces e contra, et quæque animalia in terra communiter non viventia diebus jejunii permittuntur; 3º in dubio an animalia sint terrestria vel aquatilia, ex judicio peritorum in historia naturali, et maxime ex consuetudine pronuntiadum est: sic generaliter statutum est permitendas esse diebus jejunii limaces, testudines, ranas, locustas, conchas, quia hujusmodi animalia non habent sanguinem, aut habent sanguinem frigidum, et piscibus æquiparantur. Idem plures sentiunt de viperis, quæ similes sunt anguillis (idem dicendum est de colubris), de lutris, de castoribus, de fibris; idem communiter dicitur de ardeis (*hérons*), de gallinulis chloropis (*poules d'eau*), de martibus (*martres*), de muribus aquaticis (*rats d'eau*),

quia hæc animalia ex solis piscibus communiter vivunt. Non item de corvis mariuis, de anatibus feris (*canards sauvages*) et aliis similibus, inter quæ S. Ligoriū computat generaliter aves, licet in aquis nutrientur, ut fulicæ, ac consequenter *les hérons et les poules d'eau*. Speciandus est igitur usus in unaquaque dioecesi receptus. Apud nos ardeæ et gallinulæ aquaticæ eduntur, non vero anates feri. Juscum et diversæ adipes ex carnibus provenientes, ad carnes ex quibus exprimuntur revocandæ sunt.

3º Lex esum carnium certis diebus prohibens obligat sub peccato ex natura sua mortali: sic interpretantur omnes doctores et communis fidelium opinio. Dicimus *ex natura sua*, quia transgressio hujus legis, ex omnium sensu, materiæ levitatem patitur. Unde qui in parva quantitate de carnibus prohibitis manducaret, leviter tantum peccaret; quantitas autem ad constituendum peccatum mortale requisita, ex judicio viri prudentis determinanda est.

Coqui et coquæ carnes prohibitas diebus abstinentiae ex justa ratione præparantes, non peccant juscula et condimenta degustando, quia sufficienter excusantur.

2º *De abstinentia ab ovis et lacticiniis.*

1º Ova et lacticinia olim fuisse prohibita in jejunio quadragesimali, tanquam ex animalibus prohibitis directe provenientia in dubium revocari non potest; Tertullianus enim aliqui Patres narrant primos Christianos xerophagiis, id est cibis aridis et siccis, in Quadragesima vesci solitos esse. Hinc concil. Laodicenum, anno 364 celebratum, can. 50: « Non oportet, in Quadragesima quinta feria ultimæ hebdomadæ jejunium dissolvi et totam Quadragesimam inhonorari, sed per totos dies jejunare, et escis abstinentiae convenientibus, id est aridioribus, uti. » Tempore S. Gregorii Magni, sacerdotes, diaconi et reliqui omnes jejunabant « ab omnibus quæ sementi nam carnis trahunt originem, a lacte videlicet, caseo et

» ovis; » esus vero piscium eis permittebatur ut infirmatis solatium et non ut luxurie incendium. Ita *S. Greg.* in decreto Gratiani, part. 1, dist. 4, can. 6. Hæc ovorum et lacticiniorum prohibitio, usu piscium concesso, viguit apud Græcos et Latinos a primis temporibus usque ad recentiora: multæ adhuc sunt regiones in quibus eorum usus ex sola episcoporum dispensatione fit licitus: in pluribus aliis usus invaluit ut absque dispensatione lacticinia sint licita et non ova, v. g., in diecesi Cenomanensi, in diecesibus vicinis, et generatim in Galliis.

2º Catholici generaliter contendunt prohibitionem lacticiniorum et ovorum in jejuo quadragesimali esse jure communi sub peccato mortali, idque colligitur tum ex sententia doctorum qui in hoc sibi cum *S. Thoma* concordant, tum ex sequenti propositione ab Alexandre VII damnata: « Non est evidens quod consuetudo non comedendi ova et lacticinia in Quadragesima obliget: » tum ex natura materiae quæ in se est gravis.

Diximus in jejunio quadragesimali, quia communiter docetur horum prohibitionem non extitisse, saltem sub gravi, in jejunis Quatuor Temporum et Vigiliarum, nec a fortiori in aliis jejunis per annum, ubi servabantur.

3º In diecesibus ubi quotannis episcopus a prohibitione manducandi ova dispensare solet, si, ex inadvertentia, hanc dispensationem concedere negligeret, fideles ova manducantes juxta morem consuetum peccati mortalis accusare nollemus, tum quia dispensationem præsumere possent, tum quia consuetudo legi derogans sat firma videtur ut excusat a tanto, si non a toto.

Probabilius videtur *S. Ligorii*, l. 3, n. 1010 et aliis pluribus, panes bis coctos ex farina et ovis confectos (*biscuits et gâteaux*), etc., diebus quibus ova prohibentur edere, a peccato veniali non excusari, nisi saltem aliquilis causa accedat. Sunt verba *S. Ligorii*.

3º De unica refectione, de ejus hora, et de potu.

1º Multo probabilius est unicam refectionem ad essen-

tiam jejunii ut partem magis principalem pertinere, jejunium enim sine abstinentia ab ovis, carnis et lacticiniis concepitur, cum pluribus vero refectionibus concepi non potest: unde secunda refectione proprie dicta esset, juxta omnes, peccatum mortale. Parvæ autem comestiones etiam ciborum licitorum sunt peccata venialia, quæ ex repetitionibus in eodem die fierent peccatum grave, si in materiam notabilem coalescerent, ut patet ex hac propositione ab Alexandre VII anno 1666 damnata: « In die jejunii qui saepius modicum quid comedit, etsi notabilem quantitatem in fine comedenter, non frangit jejunium. »

2º Quamvis primi Christiani a viuo diebus jejunii absinuerint, ut *S. Chrysostomus*, *S. Hieron.*, *S. Basilius* alii que Patres testantur, extra omne dubium est vinum licitum nunc esse, et a multis sæculis, si in refectione permitta sumatur; nam *vinum ita bibere permittitur, ut ebrietatem omnino fugiamus*, inquit *S. Greg. Magnus* in Decreto, part. 1, dist. 4, can. 6. Communius etiam doceatur potum vini, extra comestionem, ad sedandam sitim vel ad digestionem juvandam, jejunium non frangere; nam « jejunium non solvit nisi per ea quæ Ecclesia interdicere intendit, » inquit *S. Th. 22, q. 147, art. 6 ad 2.* « Non intendit autem Ecclesia interdicere potum, qui magis sumitur ad alterationem corporis et digestionem ciborum sumptuum, quam ad nutritionem, licet aliquo modo nutriat. » Hinc natum est axioma: *Liquidum non frangit jejunium*, quod bene intellectum nihil habet inordinatum. Sed dubium fit an vinum extra refectionem sumptum ad sedandam famem, præceptum jejunii laedit: multi affirmant, quia sic agens finem jejunii frustrat; alii vero multi negant, quia statutum legis positivæ non attendit intentionem observantis, sed ipsum actum, et finis præcepti non cadit sub præcepto. Posterior hæc sententia a multis tenetur et probabilior videtur *S. Ligorii*, l. 3, n. 1022; prior tamen est probabilis et tutior.

3º Quod de vino dicitur, pari ratione dicendum est de

aliis liquoribus qui per modum potus sumuntur, v. g., de cerevisia, de succo malorum, pirorum, de aqua saccharo mixta (*de la bière, du cidre de pommes ou de poires, de l'eau sucrée*). Saccharum per se ad potum certe non pertinet, sed multa aqua immixtum rationem potus acquirit, vel potius naturam aquæ non mutat: *a fortiori* nec partes ex hordeo depromptæ in cervisia. *Ita communissime auctores.* Idem est adhuc de *caffeo*. Hoc timorati apud nos non sibi permittunt extra necessitatem, aut saltem nisi notabilem habeant causam.

4º Major est difficultas de *chocolato*. Plurimi negant illud frangere jejunium, modo usus illius fiat ut in Mexico, id est parva quantitas *chocolati* cum multa aqua imisceatur, quia rationem tunc habet potus; secus si sumatur ad instar densæ pultis, puta, si misceatur aquæ cum majori vel æquali quantitate, quia in eo casu haberet rationem esus et non potus. Alii vero plures et communius, ut *Sanchez, Sylvius, Layman, Concina, Ferraris, S. Ligorius*, contendunt chocolatum per se jejunium frangere, quia ex se est alimentum et non potus. Illius tamen usum permittunt in modica quantitate, ad consolidandum stomachum, maxime ex consuetudine in multis locis recepta, v. g., in Italia, in Hispania, in Portugalia, etc.; consuetudo enim antiqua et generalis vim habet legem introducendi, abrogandi aut interpretandi. Hæc autem consuetudo in Gallia non viget.

5º Omnia ecligmata, quæ *S. Thomas*, 2 2, q. 147, art. 6, ad 3, vocat electuaria (*les diverses espèces de sirops*), si per modum medicinæ sumuntur, ex communissima opinione jejunium non frangunt. « Dicendum quod electuaria, inquit *S. Th.*, etiamsi aliquo modo nutriant, non tamen principaliter assumuntur ad nutrientum, sed ad digestionem ciborum: unde non solvunt jejunium, sicut nec aliarum medicinarum assumptio, nisi forte aliquis in fraudem electuaria in magna quantitate assumat per modum cibi. »

6º Quoad horam sumendi refectionem, certum est per multa sæcula non licuisse quadragesimale jejunium ante

vesperam, id est solis occasum, solvere et alia jejunia ante horam nonam, scilicet tertiam post meridiem. In duodecimo sæculo jam licebat jejunium quadragesimale hora nona solvere, ut notat *S. Th.*, 2 2, q. 147, art. 7, ad 2 et 3. Nunc vero juxta omnes, refectio licite sumitur circa meridiem, et nihilominus nomen cœnæ retinet, in memoriam antiquitatis; unde in Quadragesima vesperæ dicuntur ante prandium, et in refectorio preces pro cena statutæ recitari solent.

Diximus *circa meridiem*; quia hæc hora sumitur moraliter, et communites quæ prandere consueverunt hora undecima cum dimidia, regulam suam mutare non tenentur ob jejunium etiam Quadragesimæ. Qui vero prandium, sine causa legitime excusante, notabiliter anticiparent, graviter peccare possent; sed hoc ex iudicio viri prudentis aestimandum est. Anticipare dimidia hora peccatum esset leve; duabus horis, peccatum esset mortale, juxta *Sylvium, Lessium* aliosque communiter, inter quos plures arbitrantur anticipationem unius horæ ad constituendum peccatum mortale sufficientem esse.

7º Tempus quo prandium tuto protrahi potest non determinatur neque lege neque consuetudine: quidam concedunt usque ad quatuor horas, saltem pro Germanis, juxta morem eorum; alii vero vix permittunt duas horas, quod tamen communius admittitur.

8º Hæc refectio debet esse continua, absque morali interruptione, alioquin non esset unica, sed plures essent refectiones. Qui autem e mensa, ob superveniens negotium, surgit animo revertendi, quamvis spatio dimidiæ horæ vel horæ integræ absit (quidam dicunt duarum horarum), jejunium non frangit prandium suum continuando. Si assurgendo non habuisset animum revertendi, iterum comedendo novam assumeret refectionem, et contra legem jejunii plus minusve peccaret, secundum materia quantitatem. Concedunt tamen auctores, v. g., *Concina*, eum qui, falso credens prandium esse finitum, mappu-